

厥成五年之後各省常備軍如有仍用陳舊雜式槍礮者應由練兵處考察將該省營務處及統帶營官懲處以期早收畫一之效擬請明降 諭旨通飭各省一體遵行此外未盡事宜容臣等隨時會同 奏明辦理並查照政務處原奏將來造成新械並知會北洋大臣一體詳加考察謹 奏

署兩湖總督端奏陳籌辦鑛務並酌撥官本先購鑛山摺

竊照光緒二十九年八月初七日欽奉 上諭商部奏擬於各省設立路鑛農務工藝各項公司飭各將軍督撫會同籌辦等語現在振興商務全在官商聯絡一氣以信相孚內外合力維持廣爲董勸以期日有起色著各省將軍督撫於商部議設各項公司會同籌畫悉心經理等因欽此咨行到鄂伏念中國鑛產素富鑛質亦精外人艷稱已非一日徒以未興鑛學並無鑛師初則辦鑛無人任其山谷閉藏不免貨棄於地繼則開鑛無術漸致豪強壟斷又不免利屬於人即以湖北一省而論往往有借游歷爲名徧詣各處隱相查訪者設使中國不早自爲計其佳鑛所在必漸爲他人佔盡加以地方奸民勾串圖騙影射訟累種種弊生欲求設法保全莫若先勸鑛山購歸公家蓋一時卽無款興辦猶可存爲後圖失今不爲必至利權盡失是以購地一事又爲今日開辦鑛務第一要著先事經營勢不容緩鄂省鑛

山惟大冶一縣早經由官圈購其餘各州縣產鑛之區尙屬不少應卽查照大冶辦法先行派員查勘備價購回然後次第籌款自爲開辦現與司道熟商酌籌官本先就省城設立鑛務總局派湖北按察使岑春蓂綜理其事該員於鄂省情形至爲熟悉於交涉事件亦復因應得宜以之督辦勘地購山一切事宜必能勝任至鑛質之精粗鑛苗之衰旺現在不能不延聘鑛師妥爲勘辦鄂省已一面遴派學生赴泰西專學鑛學三四年後如有成就卽可不必假手外人此又因圈購鑛山不得不兼講鑛學以求實力興辦之情形也謹 奏

署四川總督錫奏振興川省農工商鑛諸務現辦情形摺

案查比年疊奉 明諭敕令各省振興農工商鑛諸務以爲富強根本竊以川省地廣民衆而常苦公私交瘁者撥解京外饅需歲逾六百萬故財力內竭上下不周於用生齒甲於寰宇農皆不足以養之故曠土少而遊民多奴才到川深察所由怒焉以憂亟欲以農工商鑛四者稍圖補救數月以來籌辦始有端緒如農務則推行屯墾也泰西農學研求理化蜀民尙未足語此但有氣候地質之別新法非可強而能也就中原論之蜀民技藝較優耕耘糞溉之方能不惜其勞力陟高履險幾無隙土求之內地荒穢不治者蓋寡而邊裔則有之奴才查知雷波屏山等廳縣本與大涼山野夷交錯按往者林火四出田作難安故腴壤榛蕪